

06/05/2003

Lawatan bukti hubungan baik Malaysia-Jerman

KUALA LUMPUR: Lawatan rasmi Canselor Jerman, Gerhard Schroeder, ke Malaysia bermula Ahad ini serta tiga negara Asean lain adalah lambang hubungan baik dan pengiktirafan terhadap kepentingan negara dan juga pertubuhan serantau itu kepada Jerman.

Duta Jerman ke Malaysia, Juergen Staks, berkata Schroeder ingin mendapatkan pandangan secara terus daripada Malaysia berhubung isu antarabangsa serta pembangunan Asean, khususnya Kawasan Perdagangan Bebas Asean (Afta) yang menjadi tumpuan Kesatuan Eropah.

Beliau berkata, walaupun bilangan delegasi dikurangkan kepada kira-kira 50 anggota disebabkan beberapa perkara termasuk wabak Sindrom Pernafasan Yang Teruk (SARS), Schroeder adalah pemimpin tertinggi Jerman pertama yang melawat Malaysia dan juga rantau ini.

Tambahan pula, katanya, hubungan Schroeder dengan Datuk Seri Dr Mahathir Mohamad adalah baik, mesra serta pragmatik dan adalah antara sebab utama beliau membuat lawatan balas selepas Perdana Menteri membuat lawatan rasmi ke Jerman tahun lalu dan pada 1998.

"Biasanya anda membalas kunjungan dalam tempoh dua atau tiga tahun tetapi dalam kes ini Canselor berkata `saya akan datang dalam masa 14 bulan'.

"Canselor bukannya dalam perjalanan ke China, Korea atau Jepun dan sekadar singgah di sini tetapi Canselor menumpukan kepada Malaysia dan negara Asean. Ini tidak pernah berlaku," katanya pada taklimat media di pejabatnya di sini semalam.

Schroeder yang akan tiba Ahad ini akan berada di sini sehingga pagi Selasa depan sebelum bertolak ke Singapura, Indonesia dan Vietnam dalam rangka lawatan ke rantau ini selama enam hari.

Turut sama dalam delegasi beliau ialah Menteri Ekonomi dan Buruh Jerman, Wolfgang Clement, dan Pengerusi Dr Heinrich von Piererer, Pengerusi Jawatankuasa Perindustrian Jerman Bagi Asia-Pasifik, Heinrich von Pierer, pegawai kanan kerajaan dan ahli perniagaan.

Ketika berada di sini, Schroeder akan mengadakan perbincangan dengan Perdana Menteri serta Timbalannya, Datuk Seri Abdullah Ahmad Badawi.

Staks berkata, antara lain perbincangan akan menyentuh peranan Pertubuhan Bangsa-Bangsa Bersatu (PBB) dalam pembangunan semula Iraq, penstrukturan semula serta mengembalikan kedudukan badan dunia itu, dan memanfaatkan hubungan sedia ada serta menjalinkan kerjasama berhubung isu dunia.

"Canselor amat berharap untuk memberikan peranan ini kepada PBB dalam konteks pembangunan semula Iraq, ia tidak sewajarnya dilakukan mana-mana negara tertentu tetapi oleh PBB dengan sokongan negara lain. Dalam konteks ini kami perlu membincangkan dengan negara sahabat dan berharap akan berjaya," katanya.